

欽定宋史

卷六
之八

宋史卷六

元中書右丞相總裁脫脫等修

本紀第六

真宗一

真宗應符稽古神功讓德文明武定章聖元孝皇帝諱
恒太宗第三子也母曰元德皇后李氏初乾德五年五
星從鎮星聚奎明年正月后夢以裾承日有娠十二月
二日生於開封府第赤光照室左足指有文成天字幼
英睿姿表特異與諸王嬉戲好作戰陣之狀自稱元帥
太祖愛之育於宮中嘗登萬歲殿升御榻坐太祖大奇

之撫而問曰天子好作否對曰由天命耳比就學受經
一覽成誦初名德昌太平興國八年授檢校太保同中
書門下平章事封韓王改名元休端拱元年封襄王改
元侃淳化五年九月進封壽王加檢校太傅開封尹至
道元年八月立爲皇太子改今諱仍判府事故事殿廬
幄次在宰相上宮僚稱臣皆推讓弗受見賓客李至李
沆必先拜迎送降階及門開封政務填委帝留心獄訟
裁決輕重靡不稱愜故京獄屢空太宗屢詔嘉美三年
二月太宗崩奉遺制卽皇帝位於柩前夏四月乙未尊
皇后爲皇太后赦天下常赦所不原者咸除之丙申羣

臣請聽政表三上從之戊戌始見羣臣於崇政殿西序
尋賜器幣癸卯門下侍郎兼兵部尚書平章事呂端加
右僕射弟越王元份進封雍王吳王元傑進封兗王並
兼中書令徐國公元偓進封彭城郡王涇國公元偁進
封安定郡王並同平章事元儼封曹國公姪閬州觀察
使惟吉爲武信軍節度使侍衛馬步軍都虞候傅潛殿
前都指揮使王超侍衛馬軍都指揮使李繼隆侍衛步
軍都指揮使高瓊並領諸軍節度駙馬都尉王承衍石
保吉魏咸信並爲諸軍節度使甲辰宣徽北院使知樞
密院事趙鎔加南院使左丞李至禮部侍郎李沆並參

知政事丁未中外羣臣進秩一等罷鹽鐵度支戶部副使癸丑置鎮戎軍乙卯靜海軍節度使交趾郡王黎桓加兼侍中進封南平王五月丁卯詔求直言庚午命兩制議豐盈之術以聞甲戌戶部侍郎參知政事李昌齡責授忠武行軍司馬甲申放宮人給事歲久者丙戌以鎮安軍節度使李繼隆同平章事封姊秦國晉國二公主並爲長公主齊國公主改許國長公主妹宣慈賢懿壽昌萬壽四公主並爲長公主丁亥立秦國夫人郭氏爲皇后六月乙未以太宗墨蹟賜天下名山戊戌追復涪王廷美西京留守兼中書令秦王贈兄魏王德昭太

傳岐王德芳太保己亥上大行皇帝諡曰神功聖德文武皇帝廟號太宗辛丑詔罷獻祥瑞甲辰復封兄元佐爲楚王乙巳追冊莒國夫人潘氏爲皇后諡莊懷以工部侍郎同知樞密院事錢若水爲集賢院學士贈弟元億爲代國公秋七月乙丑詔轉運使更迭赴闕訪以民事癸酉詔訪孔子嫡孫乙亥以殿前都虞候范廷召領河西軍節度使葛霸保順軍節度使王漢忠威塞軍節度使康保裔彰國軍節度使王昭遠保靜軍節度使甲申以范廷召葛霸爲定州鎮州駐泊都部署王漢忠爲高陽關行營都部署康保裔爲并代州都部署八月丙

申罷鹽井役己亥以鎮海軍節度使曹彬爲樞密使知
樞密院事趙鎔爲壽州觀察使同知樞密院事李惟清
爲御史中丞戶部侍郎向敏中給事中夏侯嶠並爲樞
密副使庚子命以十二月二日爲承天節戊申太白犯
太微己酉封乳母齊國夫人劉氏爲秦國延壽保聖夫
人先是帝以漢唐封乳母爲夫人縣君故事付中書己
乃有是命戊午熒惑入東井庚申西川廣武卒劉玘逐
巡檢使韓景祐掠蜀漢等州招安使上官正鈐轄馬知
節討平之九月丁丑二星隕西南戊寅以孔子四十五
世孫延世爲曲阜縣令襲封文宣公冬十月夏人寇靈

州合河都部署楊瓊擊走之己酉葬太宗於永熙陵丁巳賜山陵使而下銀帛有差歲星入氏十一月甲子祔太宗神主於太廟以懿德皇后配祔莊懷皇后於別廟丙寅詔兩京死罪以下遞減一等緣山陵役民賜租有差己巳詔工部侍郎錢若水修太宗實錄己卯賜帛西鄙餽餉士卒閱騎射擢精銳者十人遷職乙酉廢理檢院十二月癸巳承天節羣臣上壽於崇德殿丙申追尊母賢妃李氏爲皇太后辛丑詔諸路轉運使申飭令長勸農甲辰以銀州觀察使趙保吉爲定難軍節度使咸平元年春正月辛酉詔改元丙寅上皇太后李氏諡

曰元德丁丑召學官崔頤正講書因命宰臣選明經術者以聞戊寅閱御龍直辛巳僧你尾尼等自西天來朝稱七年始達甲申彗出營室北二月癸巳呂端等言彗出之應當在齊魯分帝曰朕以天下爲憂豈直一方耶甲午詔求直言避殿減膳乙未慮囚老幼疾病流以下聽贖杖以下釋之丁酉彗滅三月己巳置太平州壬申賜進士孫僅等宴瓊林辛巳以趙保吉歸順遣使諭陝西縱綏銀流民還鄉家給米一斛夏四月旱壬辰禱白鹿山壬寅趙保吉遣弟繼瑗入謝己酉遣使按天下吏民逋負悉除之五月戊午朔日有食之甲子幸大相國

寺祈雨升殿而雨六月辛卯詔近臣舉常參官才堪轉
運使者丙辰以旱免開封二十五州軍田租秋七月甲
子詔民供億山陵者賜租什二己巳詔沿淮諸州藏瘞
遺骸八月癸卯禁新小錢己酉幸諸王宮九月己巳詔
呂端錢若水重修太祖實錄壬申賜終南隱士种放粟
帛緡錢己卯以左衛上將軍張承德爲太子太師冬十
月丙戌朔日有食之戊子呂端爲太子太保戶部尚書
張齊賢參知政事李沆並平章事李至爲武勝軍節度
使己丑參知政事温仲舒罷爲禮部尚書樞密副使夏
侯嶠罷爲戶部侍郎翰林侍讀學士以樞密副使向敏

中爲兵部侍郎參知政事翰林學士楊礪宋湜並爲樞
密副使丙午許羣臣著述詣閣獻令兩制銓簡十一月
丙辰龍鉢貢馬二千騎甲子詔葺歷代帝王陵廟十二
月庚寅幸許國長公主第視疾癸卯令三司判官舉才
堪知州者各一人是歲溪峒吐蕃諸族勒浪十六府大
首領甘州回鶻西南蕃黎州山後蠻來貢定州雹傷稼
遣使振恤除是年租

二年春正月甲子詔尚書丞郎給舍舉升朝官可守大
郡者各一人丙子定諸司使以下至三班使臣有罪比
品聽贖二月丙申以趙普配饗太祖廟庭詔羣臣迎養

父母蠲天下逋負釋繫囚己酉戒百官比周奔競有弗
率者御史臺糾之三月丙辰江浙發廩振饑戊辰置荆
湖南路轉運使壬申王漢忠爲涇原邠寧靈環都部署
閏月丁亥以久不雨帝諭宰相曰凡政有闕失宜相規
以道毋惜直言詔天下繫囚非十惡枉法及已殺人者
死以下減一等幸許國長公主第視疾又幸北宅視德
愿疾詔兩京諸路收瘞暴骸營塞破塚戊子幸太一宮
天清寺祈雨己丑上皇太后宮名曰萬安庚寅罷有司
營繕之不急者詔中外臣直言極諫從弟德愿卒壬辰
雨辛丑江南轉運使言宣歙竹生米民採食之丙午詔

江浙饑民入城池漁採勿禁夏四月丙寅許國長公主薨五月丁亥嚴服用之制乙巳幸曹彬第視疾六月丁巳宰臣進重修太祖實錄戊午曹彬薨庚辰大食國遣使來貢七月甲申以傅潛爲鎮定高陽關行營都部署張昭允爲鈐轄給外任官職田己丑以橫海軍節度使王顯爲樞密使壬寅製聖教序賜傳法院甲辰幸國子監召學官崔偓佺講尚書大禹謨還幸崇文院賜秘書監祭酒以下器幣丙午置翰林侍讀學士以兵部侍郎楊徽之等爲之置翰林侍講學士以國子祭酒邢昺爲之八月辛亥御文德殿文武百官入閣乙卯羣臣上尊

號曰崇文廣武聖明仁孝皇帝丁巳大宴崇德殿始作
樂戊午社宴近臣於中書丙寅大閱於東北郊癸酉楊
礪卒乙亥以太師贈濟陽郡王曹彬配饗太祖廟庭司
空贈太尉中書令薛居正忠武軍節度使贈中書令潘
美右僕射贈侍中石熙載配饗太宗廟庭九月庚辰朔
日有食之戊子召宗室宴射後苑甲午奉安太宗聖容
於啓聖院新殿帝拜而慟左右皆掩泣賜修殿內侍緡
錢癸卯幸驥驥院賜從官馬還宴射後苑鎮定都部署
言敗契丹兵於廉良路殺獲甚衆冬十月壬子宜州執
溪峒蠻酋三十餘人詣闕詔釋其罪遣還癸丑放澧州

蠻界歸業民租戊午置福建路惠民倉十一月壬午召親王領大都府節鎮者弗兼長史乙酉饗太廟丙戌祀天地於圜丘以太祖太宗配大赦天下錄功臣子孫之無祿者御朝元殿受尊號冊丁亥賜羣臣帶服鞍馬器幣有差庚寅大宴含光殿壬辰張齊賢加門下侍郎李沆加中書侍郎中外臣悉加恩甲午以左神武軍大將軍德恭爲左衛大將軍左衛大將軍德彛爲左神武軍大將軍乙未詔幸河北所次頓舍給用毋泛及州縣以周瑩爲駕前軍都部署石保吉爲行營先鋒都部署己亥狩近郊辛丑賜京城父老衣帛戊午以魏咸信爲貝

冀行營都部署已酉以李沆爲京東留守十二月辛亥
賜近臣戎服廐馬甲寅駕發京師次陳橋王昭遠卒戊
午駐蹕澶州冀州言敗契丹兵於城南殺千餘人奪馬
百餘匹辛酉宴從臣於行宮以王超等督先鋒仍示以
陣圖俾識部分壬戌賜近臣甲冑弓劍幸浮橋登臨河
亭賜澶州父老錦袍茶帛甲子次大名躬御鎧甲於中
軍契丹攻威虜軍本軍擊敗之殺其酋帥府州言官軍
入契丹五合州拔黃太尉砮殲其衆焚其車帳獲馬牛
萬計丁卯召見大名府父老勞賜之是歲沙州蕃族首
領邛部川蠻西南蕃占城大食國來貢江浙廣南荆湖

旱嵐州春霜害稼分使發粟振之

三年春正月己卯朔駐蹕大名府詔并代都部署高瓊等分屯冀州邢州辛巳臨視樞密副使宋湜疾癸未以葛霸爲貝冀高陽關前軍行營都部署萊州防禦使田紹斌凡十人以功進秩契丹犯河間高陽關都部署康保裔死之乙酉流忠武軍節度使傅潛於房州都鈐轄張昭允於通州並削奪官爵丁亥幸紫極宮還登子城閱騎射高陽關貝冀路都部署范廷召等追契丹至莫州斬首萬餘級庚寅赦河北及淄齊州罪人非持杖劫盜謀故殺枉法贓十惡至死者並釋之錄將吏死事者

子孫民被焚掠者復其租罷緣邊二十三州軍權酤令
諸州舉吏民有武藝及材力過人者壬辰宋湜卒甲午
發大名府益州軍變害鈐轄符昭壽逐知州牛冕等推
都虞候王均爲首作亂詔戶部使雷有終爲盧州觀察
使帥師會李惠等討之均閉城門固守庚子至自大名
府戊申幸呂端第視疾二月庚申宴含光殿辛酉詔近
臣并知雜御史尚書省五品及帶館閣三司職者各舉
升朝官有武幹堪邊任一人癸亥以周瑩爲宣徽南院
使王繼英爲北院使並知樞密院事王旦爲給事中同
知樞密院事乙丑以王顯爲定州路行營都部署王超

爲鎮州路行營都部署丁卯益州王均開城僞遁雷有
終等入城爲所敗退保漢州李惠死之戊辰京畿旱慮
囚癸酉大雨甲戌置靜樂軍丙子賞花苑中召從臣宴
射三月戊寅朔日有食之甲午御崇政殿試禮部貢舉
人夏四月戊申朔賜進士陳堯咨等袍笏庚戌呂端薨
甲寅閩河北防城舉人康克勤等擊射乙卯葬元德皇
太后丁巳以葛霸爲邠寧環慶都部署壬申前知益州
牛冕西川轉運使張適並削籍冕流儋州適爲連州參
軍五月丁卯詔天下死罪減一等流以下釋之十惡至
死謀故劫殺坐贓枉法者論如律幸玉津園觀刈麥已

丑幸金明池觀水嬉遂幸瓊林苑宴射壬寅御試河北
舉人河決鄆州詔徙州城六月己未太白晝見丁卯以
向敏中爲河北河東宣撫使按巡郡國存慰士民秋七
月己亥以翰林侍讀學士夏侯嶠侍講邢昺爲江浙巡
撫使八月辛亥京東水災遣使安撫庚辰賜契丹降人
蕭肯頭名懷忠爲右領軍衛將軍嚴州刺史招鵲名從
化爲右監門衛將軍虫哥名從順爲千牛衛將軍九月
壬辰幸大相國寺遂宴射玉津園壬寅衛國公張永德
薨冬十月甲辰雷有終大敗賊黨復益州殺三千餘人
壬子綿漢都巡檢澄州刺史張思鈞削籍流封州乙卯

幸元份宮視疾令諸州兼羣牧己未濱州防禦使王榮
削籍流均州己丑雷有終追斬王均於富順監禽其黨
六千餘人詔原川峽路繫囚雜犯死罪以下雷有終等
以功進秩有差丙寅以翰林學士王欽若知制誥梁顥
分爲川峽安撫使延州言破大盧小盧等十族獲人畜
二十萬十一月甲戌環慶副部署徐典削籍配郢州乙
亥靈州副部署孫進責授復州團練副使鄆州決河塞
戊寅均畿內田稅壬午詔羣臣盡言無諱常參官轉對
如故事未預次對者聽封事以聞辛卯日南至御朝元
殿受朝丙申張齊賢罷爲兵部尚書十二月戊申符近

郊以親獲禽獻太廟甲寅大宴含光殿乙卯幸元份宮
視疾丁巳閱武藝遂宴射苑中庚申罷京畿均田稅育
吾藩部貢犛午甲子契丹稅木監使黃顛等率屬內附
賜冠帶丙寅開封府奏獄空詔嘉之丁卯詔河東北緣
邊吏民斬邊寇首一級支錢五千禽者倍之獲馬者給
帛二十匹是歲高麗大食國高州蠻來貢畿內江南荆
湖旱果閩州水並振之

四年春正月甲戌朔詔天下繫囚死罪已下減一等杖
罪釋之辛巳幸范廷召第視疾甲申命樞密直學士馮
拯陳堯叟詳中外封事詔應益州軍民因城亂殺傷劫

盜除官吏外皆釋不問乙酉命收瘞西川遺骸丁亥幸
開寶寺還御乾天門觀燈庚子謁啓聖院太宗神御殿
二月丁未祈雨戊申交州黎桓貢馴犀象癸丑決天下
獄丁巳幸大相國寺上清宮祈雨戊午雨帝方臨軒決
事霑服不御蓋壬戌詔羣臣子弟奏補京官者試一經
甲子釋逋負官物者二千六百餘人蠲逋負物二百六
十餘萬已納而非理者以內府錢還之沒者給其家丙
寅詔學士兩省御史臺五品尚書省諸司四品以上舉
賢良方正直言敢諫一人己巳置永利監三月甲戌撫
水州蠻酋蒙瑛等來納兵器毒藥箭誓不復犯邊乙亥

詔史館韓瑗等舉御史臺推勘官丁丑風雪帝謂宰相曰霾曠頗甚卿等思闕政以佐予治李沆等乞免官不許辛巳分川峽轉運使爲益利梓夔四路召終南隱士种放辭疾不至庚寅左僕射呂蒙正兵部侍郎向敏中並平章事中書侍郎平章事李沆加門下侍郎高瓊爲殿前都指揮使葛霸爲侍衛馬軍都指揮使王漢忠爲殿前副都指揮使並領節度司天監進儀天曆辛卯以參知政事王化基爲工部尚書同知樞密院事王旦爲工部侍郎參知政事樞密直學士馮拯陳堯叟並爲右諫議大夫同知樞密院事夏四月丙午葛霸爲并代行

營都部署壬子詔親老無兼侍者特與近任回鶻可汗
祿勝貢玉勒鞍名馬寶器願以兵助討繼遷丙辰審官
院引對京朝官閱殿最而黜陟之己未以王欽若爲左
諫議大夫參知政事庚申幸元份宮視疾遂幸諸王宮
辛未御試制科舉人五月壬申朔御乾元殿受朝京畿
繫囚罪流以下遞減一等杖罪釋之癸酉以元儼爲平
海軍節度使甲申工部侍郎致仕朱昂對便殿賜器幣
戊子亳州貢白兔還之乙未大同軍留後桑贊爲侍衛
步軍副都指揮使領河西軍節度六月癸卯有司言減
天下冗吏凡十九萬五千餘人丁巳詔東川民田先爲

江水所害者除其租丁卯詔州縣學校及聚徒講誦之所並賜九經戊申出陣圖示宰相命督將練士以備北邊秋七月庚午以河朔餽運勞民詔轉運使減徭役存恤已卯邊臣言契丹謀入寇以王顯爲鎮定高陽關三路都部署王超爲副都部署王漢忠爲都排陣使八月辛丑張齊賢爲涇原等路安撫經畧使戊申出環慶至靈州地圖險要示宰相議戰守方畧已酉御試制科舉人壬子幸開寶寺又幸御龍營閱武藝賜緡錢有差遂觀稼北郊宴射於含方園丁卯遣使巴蜀廉察風俗官吏能否戊辰社宴宰相於中書九月慶州地震李繼遷

陷清遠軍冬十月曹璨以蕃兵邀李繼遷輜重於唐龍
鎮己未張斌破契丹於長城口十一月壬申知階州竇
玘獻白鷹還之王顯奏破契丹戮二萬人獲統軍鐵林
等癸未京城民獲金牌有趙爲君萬年字庚寅攻近郊
甲午龜茲國來貢十二月丁未詔蜀賊王均旣平除追
捕亡命餘誑誤之民並釋不問訛言動衆者有司斬以
聞丙寅太白晝見南斗丁卯詔罷三路都部署兼河北
轉運使閏月己巳幸大相國寺丁丑邠寧副都部署楊
瓊等七將流嶺南戊寅李繼遷蕃族訛遇等歸順己卯
以兵部尚書張齊賢爲右僕射壬午靈州言河外砦主

李瓊等以城降西夏上念其力屈就禽特釋其親屬乙酉李繼遷部族訛豬等率屬來附庚寅河北饑蠲賦減役發廩振之是歲龜茲丹眉流宜高上溪撫水州蠻來貢梓州水遣使振恤

五年春正月壬寅李繼遷部將臥浪已等內附給田宅壬戌環慶部署張凝襲諸蕃焚族帳二百餘斬首五千級降九百餘人二月乙酉詔邊士疾病戰沒者冬春衣聽給其家己丑幸上清宮以王漢忠爲邠寧環慶路都部署三月丁酉李繼遷陷靈州知州裴濟死之庚戌北部署外郎洪湛削籍流儋州工部尚書趙昌言責授安

遠軍司馬知雜御史范正辭滁州團練副使己未御試
禮部舉人夏四月壬申詔陝西民輓送緣邊芻糧者賜
租之半壬午命三司歲較戶口丙戌賜深霸九州民租
有差癸巳復雄州榷場五月庚子減河北冗官壬寅知
榮州褚德臻坐盜取官銀棄市癸卯置憲州代州進士
李光輔善擊劒詣闕帝曰若獎用之民悉好劒矣遣還
甲辰詔申明內侍養一子制乙巳蠲天下逋負丙午以
王顯爲河陽三城節度使六月癸酉繼遷圍麟州曹璨
請濟師詔發并代石隰州兵援之乙亥以侍衛馬軍都
虞候王超爲定州路駐泊行營都部署己卯以宣徽南

院使知樞密院事周瑩爲永清軍節度使己酉詔益兵八千分屯環慶涇原知麟州衛居實言繼遷以衆二萬來攻城兵出擊走之殺傷過半是月都城大雨壞廬舍民有壓死者振恤其家秋七月甲午朔日有食之戊戌幸啟聖院太平興國寺上清宮致禱雨霽遂幸龍衛營視所壞垣室勞賜有差乙巳召終南隱士种放疏丁岡河癸丑詔許高州蠻田彥伊子承寶等入朝賜器帛冠帶乙卯募河北丁壯壬戌契丹大林砦使王昭敏等來降戎人寇洪德砦守將擊走之癸亥增川峽官奉錢八月羣臣三表上尊號不允丙子沙州曹宗壽遣使入貢

以宗壽爲歸義軍節度使乙酉石隰部署言河西蕃族
拽浪南山等四百人來歸九月戊申種放對於便殿授
左司諫直昭文館乙卯賜種放第宅冬十月己巳遣使
賫藥賜鎮戎軍將士戊寅詔河西戎人歸順者給內地
閒田處之又詔諸州長吏與佐職官同錄問大辟罪人
辛巳涇原部署繫內屬蕃族數叛者九十一人請誅之
詔釋其罪丁亥平章事向敏中罷爲戶部侍郎右僕射
張齊賢爲太常卿庚寅修豐州城十一月壬辰詔麟州
給復一年甲午六谷首領潘羅支等貢馬第給其直辛
丑享太廟壬寅祀天地於圜丘大赦丁未白州民黃受

百餘歲賜粟帛己酉封子玄祐爲信國公庚戌呂蒙正
加司空李沆加右僕射楚王元佐爲右羽林軍上將軍
雍王元份守太傅堯王元傑守太保曹國公元儼同平
章事十二月壬午賜京城百歲老人祝道崑爵一級癸
未遷麟州內屬人於樓煩是歲河北鄭曹滑州饑振之

宋史卷六

宋史卷七

元中書右丞相總裁脫脫等修

本紀第七

真宗二

六年春二月戊寅幸飛山雄武營觀發機石連弩遂宴射潛龍園己卯以京東西淮南水災遣使振恤貧民平決獄訟幸北宅視德潤疾庚辰以西涼府六谷首領潘羅支爲朔方軍節度靈州西面都巡檢使甲申封賢懿長公主爲鄭國長公主蕃部葉市族囉埋等內附己丑德潤卒庚寅屯田員外郎盛梁坐受賕枉法流崖州三

月辛卯朔欽州言交州八州使黃慶集等來歸石隰都
巡檢使言綏州東山蕃部軍使拽白等內屬已酉餞种
放還山乙卯幸惟吉第視疾戊午幸元份宮視疾四月
李繼遷寇洪德砦蕃官慶香亂磻慶等擊走之以慶香
等領刺史契丹來侵戰望都縣副都部署王繼忠陷於
敵發河東廣銳兵赴援辛巳信國公玄祐薨五月甲午
太白晝見辛亥錄望都戰沒將士子孫癸丑鎮州副都
部署李福坐望都之戰臨陣退劔削籍流封州京城疫
分遣內臣賜藥六月丁卯詔命官流竄沒嶺南者給緡
錢歸葬豐州瓦窰沒劑如羅昧克等族以兵濟河擊李

繼遷敗之丁丑隴山西首領禿逋等貢馬願附大兵擊賊丁亥寇準爲三司使復鹽鐵度支戶部副使秋七月癸丑堯王元傑薨八月庚午太白晝見辛未原渭等州言西蕃八部二十五族納質來歸丙子詔環慶秋田經寇踐傷者頃賜粟十五斛民被掠者口賜米一斛蠲棣州民租十之三九月己丑蒲端國獻紅鸚鵡丙申出內府繪帛市穀實邊甲辰以呂蒙正爲太子太師萊國公十月丁丑狐出皇城角樓獲之戊寅給軍中傳信牌十一月癸巳慮囚雜犯死罪以下遞減一等杖釋之苦寒令諸路休役兵己亥閱捧日軍士教三陣於崇政殿壬

寅幸大相國寺庚戌雨木冰甲寅有星孛於井鬼十二
月庚申遣使西北勞賜將士甲子詔求直言西面部署
言李繼遷攻西涼知府丁惟清沒焉庚午以李繼隆爲
山南東道節度使甲戌萬安太后不豫詔求良醫戊寅
赦天下死罪減一等流以下釋之是歲西涼府暨龍野
馬族三佛齊大食國來貢河北興元府遂郢州大熟
景德元年春正月丙戌朔大赦改元丁亥麟府路言契
丹言涅族拔黃三百餘帳內屬癸巳幸天駟監賜從官
馬丙申京師地震辛丑詔民間天象器物讖候禁書並
納所司焚之匿不言者死石隰州言河西蕃部四十五

族首領率屬內附京師地再震乙巳廢高州丁未京師地復震壬子開定州河通漕二月環慶部署言西涼府潘羅支集六谷蕃部合擊李繼遷敗之繼遷中流矢死羅支使來獻捷戊寅太常卿張齊賢爲兵部尙書冀益黎雅州地震三月威虜軍守將破契丹於長城口追北過陽山斬獲甚衆柳谷川蕃部入寇麟府擊敗之擒千餘人已亥皇太后崩辛丑羣臣三上表請聽政不允乙巳李沆等詣宮門見帝毀瘠過甚退上五表求見言西北軍事方殷力請聽政從之麟府路言敗西人於神堆破其砦柵己酉帝始於崇政殿西廡衰服慟哭見羣臣

夏四月甲寅上大行皇太后諡曰明德羣臣三請御正殿從之丙辰邢州地震不止以溪蠻寧息民多復業蠲澧州石門縣租二年丁卯以隆暑休北邊役兵瀛州地震五月甲申邢州地震不止賜民租之半蒲端國遣使來貢丁巳詔諸路轉運使代還日在任興除利害升黜能否凡所經畫事悉條上以聞六月己未幸北宅視德欽疾洪德砦言繼遷部將都尾等率屬歸附甲子詔罷川陝閩廣州軍貢承天節自今三千里外者罷之鎮戎軍言敗戎人於石門川庚午德欽卒洪德砦言蕃部羅泥天王本族諸首領各率屬歸附趙保忠卒壬午暑

甚罷京城工役遣使賜賜者藥秋七月癸未班用兵誅
賞格丙戌李沆薨庚寅以翰林學士畢士安爲吏部侍郎
郎參知政事庚子益都民李仁美國凝母皆百餘歲詔
賜粟帛八月涇原部署言擊萬子軍主族帳斬首二百
餘級己未以畢士安寇準並平章事宣徽南院使王繼
英爲樞密使同知樞密院事馮拯陳堯叟並僉署樞密
院事壬申詔常參官二人共舉州縣官可任幕職者一
人丙子以保平軍節度石保吉爲武寧軍節度同平章
事庚辰遣使廣南東西路疎決繫囚犒勞軍校父老訪
民間便宜九月癸未罷北面齋御劔內臣以劔屬主將

丙戌令諸路轉運使考察官吏能否己丑詔翰林學士承旨宋白等舉文武官可任藩郡者各一人丁酉召宰相議親征契丹耶律吳欲來降宋州汴水決乙巳置祈州河決澶州遣使具舟濟民給以糧餉閏月乙卯詔河北吏民殺契丹者所至援之仍頒賞格壬申江南旱遣使決獄訪民疾苦祠境內山川癸酉明德皇太后殯沙臺北平砦威虜軍合兵大破契丹乙亥參知政事王欽若判天雄軍府兼都部署契丹統軍撻覽率衆攻威虜順安軍三路都部署擊敗之斬偏將獲其輜重又攻北平砦及保州復爲州砦兵所敗撻覽與契丹主及其母

并衆攻定州宋兵拒於唐河擊其游騎契丹駐陽城淀
因王繼忠致書於漠州石普以講和丙子以天雄軍都
部署周瑩爲駕前貝冀路都部署侍衛馬軍都指揮使
葛霸爲駕前邢洛路都部署己卯高繼祖率兵擊敗契
丹數萬騎於岢嵐軍冬十月壬午詔修葺歷代聖賢陵
墓癸未麟府路率部兵入朔州破大狼水砦乙酉令漕
運所經州軍長吏兼輦運事戊子祔明德皇后於太廟
庚寅命張齊賢兼青淄濰安撫使丁謂兼鄆齊濮安撫
使癸巳幸故鄭國長公主第乙未詔王超等率兵赴行
在丁酉詔魏能張凝田敏屯定州癸卯以廝鐸督爲朔

方軍節度靈州西面巡檢西涼府六谷大首領保莫州
威虜岢嵐軍及北平砦皆擊敗契丹旣而王繼忠上言
契丹請和命閣門祗候曹利用徃答之丁未以雍王元
份爲東京留守己酉置龍圖閣待制十一月辛亥太白
晝見乙卯遣使撫河北契丹攻瀛州知府李延渥率兵
敗之殺傷十餘萬衆遁去官吏進秩賜物有差己未遣
使安撫河東諸州契丹逼冀州知州王嶼擊走之甲子
校獵近郊丙寅遣使安集河北流民戊辰以山南東道
節度同平章事李建隆爲駕前東面排陣使武寧軍節
度同平章事石保吉爲駕前西面排陣使石州地震庚

午車駕北巡司天言日抱珥黃氣充塞宜不戰而却癸酉駐蹕韋城縣甲戌寒甚左右進貂帽毳裘却之曰臣下皆苦寒朕安用此王繼忠數馳奏請和帝謂宰相曰繼忠言契丹請和雖許之然河冰已合且其情多詐不可不爲之備契丹兵至澶州北直犯前軍西陣其大帥撻覽耀兵出陣俄中伏弩死丙子帝次澶州渡河幸北砦御城北樓召諸將撫慰鄆州得契丹謀者斬之戊寅曹利用使契丹還十二月庚辰朔日有食之契丹使韓杞來講和辛巳遣使安撫河北京東壬午幸城南臨河亭賜鑿凌軍綿襦癸未幸北砦又幸李繼隆營命從官

將校飲犒賜諸軍有差詔諭兩京以將班師甲申契丹使姚東之來獻御衣食物乙酉御行營南樓觀河遂宴從官及契丹使丙戌遣使撫諭懷孟澤潞鄭滑等州放強壯歸農遣監西京左藏庫李繼昌使契丹定和戒諸將勿出兵邀其歸路丁亥遣使安集河北流民瘞暴骸以閤門祇候曹利用爲東上閤門使忠州刺史戊子幸北砦勞軍召李繼隆石保吉宴射行宮西亭壬辰赦河北諸州死罪以下民經蹂踐者給復二年死事官吏追錄子孫癸巳雍王元份疾命參知政事王旦權東京留守甲午車駕發澶州大寒賜道傍貧民襦袴乙未契丹

使丁振以誓書來丁酉契丹兵出塞戊戌至自澶州己亥幸雍王元份宮視疾辛丑錄契丹誓書頒河北河東諸州癸卯遣使撫問河北東西路官吏將卒訪察功狀甲辰改威虜諸軍名戊申詔恤河北傷殘是歲交州西涼州西高豐甘沙州占城大食蒲端龜茲國來貢江南東西路饑陝濱棣州蝗害稼命使振之

二年春正月庚戌朔以契丹講和大赦天下非故鬪殺放火強盜僞造符印犯賊官典十惡至死者悉除之壬子放河北諸州強壯歸農令有司市耕牛給之癸丑罷諸路行營合鎮定兩路都部署爲一乙卯罷北面部署

鈐轄都監使臣二百九十餘員振河北饑遣監察御史
朱搏赴德清軍收瘞戰沒遺骸致祭罷江淮荆浙增權
酤錢丙辰幸雍王元份宮視疾甲子詔淮南以上供軍
儲振饑民戊辰以天平軍節度使王超爲崇信軍節度
省河北戍兵十之五緣邊三之一所在量軍儲饋給勿
調民飛輓癸酉幸李繼隆第視疾京西民轉送軍儲者
賜租十二丁丑詔河北轉運使察官屬不任職者以名
聞戊寅取淮楚間踏犁式頒之河朔二月嘉邛州鑄大
鐵錢置霸州安肅軍榷場癸未李繼隆卒甲申定入粟
實邊授官等級乙酉遣使安撫交州甲午詔緣邊得契

丹馬牛悉縱還之沒蕃漢口歸業者給資糧弛邊民鐵
禁環州言戎人入寇擊走之俘其軍主癸卯遣太子中
允孫僅等使契丹丁未呂蒙正對便殿三月甲寅御試
禮部貢舉人戊午鄭州防禦使魏能坐歸師不整責授
右羽林將軍庚申禁邊民入外境掠奪夏四月賜進士
李迪等瓊林宴丁酉樞密直學士劉師道責授忠武軍
行軍司馬右正言知制誥陳堯咨單州團練使俱坐考
試不公己亥葺河北城池癸卯置資政殿學士以王欽
若爲之馮拯爲叅知政事甲辰以寧國軍留後駙馬都
尉吳元扆爲武勝軍節度戎人寇環州擊敗之執其酋

慶曆請戮之詔釋其罪配淮南五月戊申幸國子監丁巳司天少監史序上乾元寶典己未幸元份宮視疾庚申御試河北舉人丁卯宴近臣于資政殿餞种放游嵩山癸酉詔天下權利勿增羨爲額六月丁丑詔勸學幸諸王宮己卯命法直官用士人已丑曹州民趙諫趙諤以恐喝賊巨萬伏誅辛卯以趙德明歸款諭河西諸蕃各守疆界高瓊求板本經史詔給之秋七月庚戌劉質進兵要論召試中書甲子詔復賢良方正能直言極諫等六科八月戊寅雍王元份薨丙戌有司上新定權衡法遣內臣奉安太祖聖容於揚州建隆寺丁亥翰林學

士冕迥先爲鄆王元份留守官屬坐輔導無狀責授右
司郎中辛丑幸南宮及恭孝太子宮有星孛於紫微九
月丁未以向敏中爲鄜延路都部署庚戌淮南旱詔轉
運使疏理繫囚癸亥三司上新編敕羣臣三表上尊號
不允庚午幸興國寺傳法院觀新譯經辛未命近臣慮
開封府繫囚壬申詔荆湖溪峒民爲蠻人所掠而歸者
勿限年月給還舊產冬十月庚辰丁謂上景德農田編
敕乙酉畢士安薨丙戌遣職方郎中韓國華等使契丹
十一月戊申詔翰林侍講學士邢昺等舉堪爲學官者
十人丙辰享太廟丁巳祀天地于圓丘大赦庚申大宴

含光殿癸亥寇準加中書侍郎兼工部尚書楚王元佐
爲右衛上將軍彭城郡王元偓進封寧王安定郡王元
偁進封舒王曹國公元儼進封廣陵郡王安定郡公惟
吉加同平章事癸酉契丹使來賀承天節十二月辛巳
置資政殿大學士以王欽若爲之癸未以高瓊爲忠武
軍節度葛霸爲昭德軍節度對京畿父老於長春殿賜
帛有差契丹遣使賀明年正旦是歲夏州西涼府邛部
川蠻來貢淮南兩浙荆湖北路饑京東蝻生閩颶風不
害稼遣使分振

三年春正月丁巳親釋逋負繫囚振畿縣貧民收瘞遺

骸丁卯詔緣邊歸業民給復三年辛未置常平倉二月
甲戌幸北宅省德恭疾乙亥詔京東西淮南河北振乏
食客戶己卯謁明德皇后攢宮賜守奉人緡帛甲申禁
民開近陵域地以宋州爲應天府丁亥王繼英卒戊戌
以中書侍郎兼工部尙書平章事寇準爲刑部尙書左
丞參知政事王旦爲工部尙書平章事己亥王欽若陳
堯叟並知樞密院事翰林學士趙安仁參知政事樞密
都承旨韓崇訓馬知節並僉署樞密院事三月乙巳客
星出東南辛亥免隨州光化民貸糧己未詔儆諫臣悉
心獻替夏四月癸酉幸秦國長公主第丙子幸開寶寺

遂幸御龍直班院觀教閱弓刀又幸左麒麟院賜從官馬羣牧使等器幣還幸崇文院觀圖籍賜編修官金帛有差已卯置清平宣化二軍乙酉置河北緣邊安撫使副都監于雄州壬辰命使巡撫益利梓夔福建諸路決獄及犒設將吏父老乙未种放賜告歸終南山己亥遣使巡撫江浙路五月壬寅日當食不虧周伯星見辛亥置京東五路巡檢丁巳幸北宅視德恭疾己未德恭卒西涼府廝鐸督部落多疾賜以藥物渭川妙娥族三千餘帳內附復置高州六月丙子羣臣固請聽樂從之詔三班考較使臣以七年爲限知廣州凌策請發兵定交

陟亂帝以黎桓素修職貢不欲伐喪命遵前詔安撫戊寅罷兩川稅課金二分乙未汴水暴漲賜役兵錢丙申遣使振應天府水災及瘞溺死者秋七月壬寅減鄜延戍兵乙巳太白晝見庚戌詔渭州鎮戎軍收獲蕃部牛送給內地耕民壬子賜廣南聖惠方歲給錢五萬市藥療病者邵暉上邕州至交陞水陸路及控制宜州山川等圖帝曰祖宗闢土廣大唯當慎守不必貪無用地苦勞兵力甲子大宴於含光殿始用樂丙寅大風遣中使視稼八月甲戌閱太常新集雅樂丁丑幸寶相院戊寅詔川陝戍兵二年者代之庚辰工部侍郎董儼坐躁競

傾狡責授山南東道行軍司馬九月甲寅宴射含芳園
丙辰御試賢良方正直言極諫科壬戌幸元偃宮視疾
甲子置諸陵齋宮乙丑放西州納質人夏州趙德明奉
表歸款冬十月庚午以趙德明爲定難軍節度兼侍中
封西平王甲午兩浙轉運使姚鉉坐不法除名爲連州
文學丁酉葬明德皇后十一月壬寅周伯星再見十二
月癸酉太白晝見戊寅高瓊卒乙酉狩近郊以親獲兔
付有司薦廟戊子詔牛羊司畜有孳乳者放牧勿殺辛
卯朝陵緣路禁樂壬辰幸秦國長公主第又幸北宅視
德鈞疾是歲西涼府龕谷十族高溪州風琶溪洞諸蠻

會來貢京東西河北陝西饑振之博州蝻不爲災

四年春正月己亥朔御朝元殿受朝詔京畿繫囚流以

下減一等甲辰以陳堯叟爲東京留守德鈞卒乙巳契

丹使辭歸國以丁謂爲隨駕三司使己未車駕發京師

庚申次中牟縣除逋負釋繫囚賜父老衣幣所過如之

王顯卒丙寅次永安鎮丁卯帝素服詣諸陵減西京及

諸路繫囚罪己亥詔置永安縣及三陵副使都監二月

己巳幸西京經漢將軍紀信塚司徒魯恭廟贈信太尉

恭太師命吏部尙書張齊賢祭周六廟詔從官先塋在

洛者賜告祭拜癸酉詔西京建太祖神御殿置國子監

武成王廟甲戌幸上清宮詔賜醑三日辛巳錄唐白居易
易孫利用爲河南府助教壬午幸呂蒙正第甲申御五
鳳樓觀醑召父老五百人賜飲樓下丁亥幸元偃宮戊
子葺周六廟加號列子增封唐孝子潘良瑗及其子季
通墓仍禁樵採庚寅詔河南府置五代漢高祖廟辛卯
車駕發西京甲午次鄭州遣使祀中嶽及周嵩懿二陵
丁酉賜隱士楊璞繪帛三月己亥至自西京甲辰謁啟
聖院太宗神御殿癸丑趙德明遣使來謝廩給因貢驪
馬優賜答之丁巳詔天下收瘞遺骸致祭庚申蠲河南
府倉庫吏逋負芻糧緡帛四十五萬夏四月癸酉詔嶺

南官除赴以時以避炎瘴辛巳皇后郭氏崩甲午詔權
酷不得增課五月丙申朔日有食之辛亥有司上大行
皇后諡曰莊穆減并代戍兵屯河東以省饋運戊午幸
元偁宮視疾兗州增二千戶守孔子墳閏月戊辰減劔
隴等三十九州軍歲貢物夔賀等二十七州軍悉罷之
己巳幸秦國長公主第省疾壬申御試制科舉人丙戌
詔張齊賢等各舉供奉官侍禁殿直有謀畧武幹知邊
事者二人癸巳詔開封府斷獄雖被旨仍覆奏六月盛
暑減京城役工日課之半丁未命翰林講讀樞密直學
士各舉常參官一人充御史司天監言五星聚而伏於

鶉火乙卯葬莊穆皇后秋七月丁卯莊穆皇后祔別廟
庚午置靈臺令壬申增置開封府判官推官各一員甲
戌宜州兵亂軍校陳進殺知州劉永規等刳判官盧成
均爲首詔閣門使曹利用等討之乙亥交州來貢賜黎
龍廷九經及佛氏書辛巳以龍廷爲靜海軍節度交阯
郡王賜名至忠癸巳復置諸路提點刑獄八月壬寅幸
大相國寺遂幸崇文院觀書賜修書官器幣又幸內藏
庫丁未中書門下言莊穆皇后祥除已久秋宴請舉樂
不允己酉頒宜州立功將士賞格益州地震辛亥賜文
宣王四十六世孫聖佑同學究出身壬子邢昺加工部

尙書中書門下再表請秋宴聽樂又不允丙辰涇原路
言瓦亭砦地震丁巳詔王旦楊億等修太祖太宗史置
龍圖閣直學士以右諫議大夫杜鎬爲之丁謂上景德
會計錄九月己巳賜交趾郡王印及安南旌節壬申賜
畿縣聖惠方丁亥幸舒王宮視疾辛卯賜監修國史王
旦宴壬辰日上有五色雲冬十月甲午朔日當食雲陰
不見曹利用破賊於象州擒盧成均斬陳進優賜將士
利用等進秩賜物有差乙巳頒考試進士新格祠祭置
監祭使二員以御史充詔翰林學士晁迥等舉常參官
可知大藩者二人丁未升象州爲防禦甲寅詔宜柳象

州懷遠軍死罪以下非十惡謀故鬪殺官吏犯枉法贓者竝原之廣南東西路雜犯死罪以下遞減一等脅從受署者勿理獨宜柳象州懷遠軍丁錢及夏秋租桂昭州秋租乙卯毀諸道官司非法訊囚之具十一月戊辰日南至御朝元殿受朝曹利用等言招安賊黨其饋賊食物者請追捕減死論詔釋不問十二月己亥賜近臣契丹錦綺綾縠等物癸卯廢兗州鐵冶己未甘州僧翟大秦等獻馬給其直是歲河西六谷夏州沙州大食占城蒲端國西南蕃溪峒蠻來貢雄州安肅廣信饑宛邱東阿須成縣蝗不爲災諸路豐稔淮蔡間麥斗十錢粳

米斛二百

大中祥符元年春正月乙丑有黃帛曳左承天門南鵬尾上守門卒塗榮告有司以聞上召羣臣拜迎於朝元殿啟封號稱天書丁卯紫雲見如龍鳳覆宮殿戊辰大赦改元羣臣加恩賜京師酺幽州旱求市麥種夏州饑請易粟竝許之己巳詔黎雅維茂四州官以瘴地二年一代甲戌大雪停汴口蔡河夫役戊寅蠲畿內貸糧己卯詔以天書之應申儆在位乙酉制加交趾郡王黎至忠功臣食邑二月壬辰御乾元門觀酺賜父老千五百人衣服茶綵丁酉分遣中使六人錫邊臣宴丙午申明

非命服勿服銷金及不許以金銀爲箔之制三月甲戌
兗州父老千二百人詣闕請封禪丁卯兗州并諸路進
士等八百四十人詣闕請封禪壬午文武官將校蠻夷
耆壽僧道二萬四千三百七十餘人詣闕請封禪不允
自是表凡五上夏四月甲午詔以十月有事於泰山遣
官告天地宗廟嶽瀆諸祠乙未以知樞密院事王欽若
參知政事趙安仁爲泰山封禪經度制置使丙申以王
旦爲封禪大禮使馮拯陳堯叟分掌禮儀使庚子幸元
脩宮視疾壬寅御試禮部貢舉人丙午作昭應宮戊申
幸秦國長公主第省疾又幸晉國魯國長公主第並賜

白金千兩綵二千匹曹濟州廣濟軍耆老二千二百人
詣闕請臨幸五月壬戌王欽若言泰山醴泉出錫山蒼
龍見丙子詔瘞汴蔡廣濟河流尸暴骸仍致祭丁丑幸
南宮視惟能疾壬午詔緣路行宮舊屋止加塗墍毋別
劄癸未置天書儀衛使副扶侍使都監夾侍凡有大禮
卽命之詔離京至封禪以前不舉樂所經州縣勿以聲
伎來迓甲申放後宮一百二十人戊子詔除乘輿供帳
存於禮文者如舊自今宮禁中外進奉物勿以銷金文
繡爲飾六月乙未天書再降於泰山醴泉北丁酉詔宮
苑皇親臣庶第宅飾以五綵及用羅製幡勝繪帛爲假

花者並禁之壬寅迎泰山天書於含芳園雲五色見俄
黃氣如鳳駐殿上庚戌曲赦兗州繫囚流罪以下辛亥
羣臣表上尊號曰崇文廣武儀天尊道寶應章感聖明
仁孝皇帝秋七月庚申太白晝見丙寅詔諸州市上供
物非土地所宜者罷之八月己丑上太祖尊諡曰啟運
立極英武聖文神德立功大孝皇帝太宗曰至仁應道
神功聖德文武大明廣孝皇帝庚寅詔東封道路軍馬
毋犯民稼開封府毋治道役民庚子置河東緣邊安撫
司乙巳黔州言磨嵯洛浦蠻首領龔行滿等率族二千
三百人內附己酉王欽若獻芝草八千餘本九月戊午

令有司勿奏大辟案岳州進三春茅庚申以向敏中權
東京留守甲子奉天書告太廟悉陳諸州所上芝草嘉
禾瑞木於仗內戊辰幸元偃宮視疾壬申知晉州齊化
基坐貪暴削籍流崖州乙亥幸潛龍園宴射丁丑幸惟
吉宮視疾戊寅西京諸州民以車駕東巡貢獻召對勞
賜之己卯以馬知節爲行營都部署庚辰趙安仁獻五
色金玉丹紫芝八千七百餘本乙酉親習封禪儀於崇
德殿冬十月戊子上御蔬食庚寅以巡幸置考制度使
副凡巡幸則命之是夕五星順行同色辛卯車駕發京
師扶侍使奉天書先道丙申次澶州宴周瑩於行宮戊

戊許鄆齊等州長吏赴泰山陪位辛丑駐蹕鄆州神光
起昊天玉冊上甲辰詔扈從人毋壞民舍什器樹木丁
未法駕入乾符縣奉高宮戊申王欽若等獻泰山芝草
三萬八千餘本己酉五色雲起嶽頂庚戌法駕臨山門
黃雲覆輦道經險峻降輦步進先夕大風至是頓息辛
亥享昊天上帝於圓臺陳天書於左以太祖太宗配帝
袞冕奠獻慶雲繞壇月有黃光命羣臣享五方帝諸神
於山下封祀壇上下傳呼萬歲振動山谷降谷口日有
冠戴黃氣紛郁壬子禪社首如封祀儀紫氣下覆黃光
如星繞天書匣縱四方所獻珍禽奇獸還奉高宮日重

輪五色雲見作會真宮癸丑御朝觀壇之壽昌殿受羣
臣朝賀大赦天下常赦所不原者咸赦除之文武並進
秩賜致仕官本品全奉一季京朝官衣緋綠十五年者
改賜服色令開封府及所過州軍考送服勤詞學經明
行修舉人其懷材抱器淪於下位及高年不仕德行可
稱者所在以聞三班使臣經五年者與考課兩浙錢氏
泉州陳氏近親蜀孟氏湖南馬氏荆南高氏廣南河東
劉氏子孫未食祿者聽敘用賜天下醕三日改乾封縣
爲奉符縣泰山七里內禁樵採大宴穆清殿又宴近臣
泰山父老於殿門賜父老時服茶帛甲寅復常膳次太

平驛賜從官辟寒丸花茸袍丙辰次兗州以州爲大都督府十一月戊午幸曲阜縣詣文宣王廟鞞袍再拜幸叔梁紇堂近臣分奠七十二弟子遂幸孔林加謚孔子曰立聖文宣王遣官祭以太牢給近便十戶奉塋廟賜其家錢三十萬帛三百匹以四十六世孫聖佑爲奉禮郎近屬授官賜出身者六人追謚齊太公曰昭烈武成王令青州立廟周文公曰文憲王曲阜縣立廟辛酉賜諸蕃使袍笏壬戌次東都縣幸廣相寺癸亥次鄆州幸開元寺丁卯賜曲阜孔子廟經史辛未幸河瀆廟加封癸酉曲宴永清軍節度使周瑩賜兵士緡錢丁丑帝至

自泰山奉天書還宮壬午詔以正月三日爲天慶節甲申命王旦奉上太祖太宗謚冊親享太廟乙酉大宴含光殿十二月辛卯御乾元殿受尊號庚子葛霸卒辛丑王旦加中書侍郎兼刑部尚書楚王元佐加太傅寧王元偓爲護國軍節度舒王元偁爲平江鎮江軍節度並兼侍中廣陵郡王元儼進封榮王安定郡公惟吉爲威德軍節度餘進秩有差癸卯幸上清宮景德開寶寺王欽若加禮部尚書甲辰張齊賢爲右僕射溫仲舒寇準並爲戶部尚書王化基邢昺郭贄並爲禮部尚書詔天下宮觀陵廟名在地志功及生民者並加崇飾戊申以

德雍德文德存惟正惟忠惟敘惟和惟憲並領諸州刺史允升允言允成允寧允中並爲各衛將軍庚戌幸元偁宮視疾又幸元偁宮辛亥交趾郡王黎至忠加同平章事壬子幸元偁宮契丹使上將軍蕭智可等來賀是歲西涼府甘州三佛齊大食國西南番等來賀封禪諸路言歲稔米斗七八錢

二年春正月癸亥以封禪慶成賜宗室輔臣襲衣金帶器幣乙丑置內殿承制戊辰詔誘人子弟析家產或潛舉息錢輒壞墳域者令所在擒捕流配庚午詔讀非聖之書及屬辭浮靡者皆嚴譴之己鏤板文集令轉運司

擇官看詳可者錄奏乙酉以陝西民饑遣使巡撫二月
己丑改定入內內侍省內侍名職壬辰詔立曲阜縣孔
子廟學舍乙未賜撫州高年黃泰粟帛甲辰蠲同華民
租乙巳幸大相國等寺上清宮祈雨戊申遣使祠太乙
祀玄冥己酉雨癸丑禁毀金寶塑浮屠像甲寅以丁謂
爲三司使三月丙辰日當食陰晦不見辛未賜京城酺
己卯左屯衛將軍允言坐稱疾不朝降太子左衛率夏
四月戊子昇州火遣御史訪民疾苦蠲被火屋稅己丑
餞种放還山乙未河北旱遣使祠北岳己亥以丁謂爲
修昭應宮使壬寅詔禁中外羣臣非休暇無得羣飲廢

職詔醫官院處方并藥賜河北避疫邊民丙午試服勤
詞學經明行修國監生丁未振陝西民饑五月丁卯追
封孔子弟子七十二人罷韶州獻頻婆菓丁卯遣使陝
西決獄流罪以下減一等死罪情可憫者上請庚辰陝
西旱遣使禱太平宮后土西嶽河瀆諸祠代州地震六
月乙酉頒幕職州縣官招集戶口賞條甲午幸昭應宮
賜修宮使器幣辛卯保州增屯田務兵三百人戊戌麟
府言社慶族依唐龍鎮爲援數擾別部請出兵襲之帝
曰均吾民也不許壬寅詔量留五坊鷹鶻備諸王從時
展禮餘悉縱之罷邕宜州歲貢藥箭庚戌御試東封路

服勤詞學經明行修貢舉梁固等九十二人秋七月甲寅詔張齊賢等各舉才堪御史者一人丁巳置糾察在京刑獄司辛酉復以萬安宮爲滋福殿己巳幸惟吉宮視疾辛未以昭應宮爲玉清昭應宮乙亥蠲京東徐濟七州水災田租戊寅詔孔子廟配享魯史左邱明等十人加封爵庚辰蠲天下封禪赦前逋負千二百六十六萬緡八月丙戌京東惠民河溢居民避水所過津渡戒有司勿算甲辰西南蕃龍漢堯來貢賀東封加漢堯寧德大將軍九月戊午賜秦州被水民粟人一斛壬戌合鎮定部署爲一甲子浚汴口命工部侍郎馮起爲契

丹國信使乙丑幸潛龍園宴射甲戌遣使賜戎瀘軍民
辟瘴藥乙亥無爲軍言大風拔木壞城門營壘民舍壓
溺者千餘人詔內臣恤視蠲來年租收瘞死者家賜米
一斛丁丑發官廩振鳳州水災冬十月癸未優賞寧朔
軍士戊子詔江浙運糧兵卒經冬停役兩月甲午詔天
下置天慶觀甲辰兗州霖兩害稼振恤其民十一月丙
戌作文武七條戒官吏甲子詔諸路官吏蠹政害民轉
運使提點刑獄官不舉察者坐之癸酉蕃部阿黎等來
朝貢授阿黎懷化司戈十二月辛巳詔晉國大長公主
喪罷承天節上壽及明年元旦朝會交州黎至忠貢馴

犀乙未幸惟吉宮視疾辛丑丁謂上封禪朝觀祥瑞圖
劉承珪上天書儀仗圖甲辰幸惟吉宮視疾契丹國母
蕭氏卒輟視朝是歲于闐西涼府西南蕃羅崑州蠻來
貢雄州蟲食苗卽死遣使振恤

三年春正月丁巳賜建安軍父老江禹錫粟帛二月乙
酉丁謂請承天節禁屠宰刑罰從之癸巳交州黎至忠
卒大校李公蘊自稱留後己亥禁方春射獵每歲春夏
所在長吏申明之辛丑以張齊賢判河陽閏月辛亥帝
御文德殿羣臣入閣甲寅冬官正韓顯符上新造銅候
儀乙卯詔轉運司貸恤黎州夷人丁卯幸開封府射堂

宴射賜開封府將吏器幣戊辰詔東京畿內死罪以下
遞減一等將吏逮事太宗藩府者並賜予赤縣父老本
府宴犒年九十者授攝官賜粟帛終身八十者爵一級
甲戌以射堂爲繼照堂丁丑召宰臣於宜聖殿謁太宗
聖容玉皇像戊寅幸韓國長公主第視疾三月壬辰以
權靜海軍留後李公蘊爲靜海軍節度封交阯郡王賜
衣帶器幣丙申幸石保吉第視疾辛丑詔戎瀘州給復
一年艱食者振之夏四月辛亥左屯衛將軍允言坐狂
率責授太子左衛副率壬子石保吉卒乙卯陝西民疫
遣使齎藥賜之丁巳詔中書以五月一日進中外文武

升朝官及奉使歲舉官名籍辛酉賜泰山隱士秦辨號
貞素先生放還山甲子契丹國母葬廢朝禁邊城樂甲
戌加王旦兵部尚書知樞密院事王欽若戶部尚書陳
堯叟工部尚書五月己卯幸惟吉宮視疾壬午以西涼
府覓諾族瘴疫賜藥丙戌惟吉卒辛丑京師大雨平地
數尺壞廬舍民有壓死者賜布帛六月庚戌邊臣言契
丹饑來市糴詔雄州糴粟二萬石振之河中府父老千
餘人請祀后土不許丙辰頒天下釋奠先聖廟儀并祭
器圖詔前歲陝西民飢有鬻子者官爲購贖還其家壬
戌幸邢曷第視疾賜金帛乙丑幸元偁宮視疾秋七月

丙申溫仲舒卒己亥以右丞向敏中爲工部尚書資政
殿大學士置龍圖閣學士以直學士杜鎬爲之詔南宮
北宅大將軍以下各勤講肄諸子十歲以上並受經學
書勿令廢惰辛丑文武官將校等三上表請祠汾陰后
土八月丁未朔詔明年春有事於汾陰州府長吏勿以
修貢獻祭煩民戊申陳堯叟爲祀汾陰經度制置使己
酉王旦爲祀汾陰大禮使王欽若爲禮儀使庚戌詔汾
陰路禁弋獵不得侵占民田如東封之制辛亥以江南
旱詔轉運使決獄壬子幸元偁宮視疾昇洪潤州屢火
遣使存撫祠境內山川戊午賜占城國主馬及器甲庚

申幸天駟監賜從官馬解州池鹽不種自生辛酉給鄆州牧馬草地還民甲子罷江淮和糴所在繫囚遞減一等盜穀食者量行論決丁卯羣臣五表上尊號不許戊辰詔昇洪楊廬州長吏兼安撫使甲戌以澄州團練使朱能爲左龍武軍大將軍乙亥河中府父老千七百人來迎上勞問之賜以緡帛九月癸未賜錢三十萬給故盧多遜子葬其父母丁亥作宗室座右銘賜諸王華州言父老二千餘人請幸西嶽癸巳杖殺入內高品江守恩於鄭州知州俞獻卿坐論救削一任乙未幸崇真資聖院視吳國長公主疾甲辰內出綏撫十六條頒江淮

南安撫使冬十月辛亥契丹使耶律寧告征高麗河中
民獲靈寶真文庚申丁謂等上大中祥符封禪記十一
月庚寅遣內臣奉安宣祖太祖聖容於二陵乙未甘州
回鶻來貢己亥幸太乙宮陝州黃河清十二月陝州黃
河再清庚戌集賢校理晏殊獻河清頌癸丑詔天下貧
民及漁採者過津度勿算乙卯告太廟詔自今謁廟入
東偏門以資政殿大學士向敏中權東京留守丁巳翰
林學士李宗諤等上諸道圖經辛酉謁玉清昭應宮丙
寅詔沙門島流人特給口糧己巳作奉天庇民述示宰
相禁扈從人燔道路草木辛未以太宗御書賜交州李

公蘊是歲龜茲占城交州來貢陝西饑江淮南旱

宋史卷七

宋史卷八

元中書右丞相總裁脫脫等修

本紀第八

真宗三

四年春正月辛巳詔執事汾陰懈怠者罪勿原乙酉習
祀后土儀丁亥將祀汾陰謁啟聖院太宗神御殿普安
院元德皇后聖容丙申詔以六月六日天書再降日爲
天貺節丁酉奉天書發京師日上有黃氣如匹素五色
雲如蓋紫氣翼仗庚子右僕射判河陽張齊賢見於汜
水頓陳堯叟獻白鹿辛丑陳幄殿於訾村望拜諸陵甲

辰至慈澗頓賜道傍耕民茶菴二月戊申賜扈駕諸軍
緡錢華州獻芝草東京獄空壬子出潼關渡渭河遣近
臣祠西嶽癸丑次河中府丁巳黃雲隨天書輦次寶鼎
縣奉祇宮戊午登後圃延慶亭己未潘泉湧有光如燭
辛酉祀后土地祇是夜月重輪還奉祇宮紫氣四塞幸
開元寺作大寧宮壬戌甘州回鶻蒲端三麻蘭勿巡蒲
婆大食國吐蕃諸族來貢大赦天下常赦不原者咸赦
除之文武官並遷秩該敘封欲回授祖父母者聽四品
以上迨事太祖太宗潛藩或嘗更邊任家無食祿者錄
其子孫建寶鼎縣爲慶成軍建隆佐命及公主將相丘

冢所在致祭給西京分司官實奉三分之一令法官慎
刑名有情輕法重者以聞賜天下醮三日大宴羣臣於
穆清殿賜父老酒食衣幣作汾陰配饗銘河瀆四海贊
召草澤李瀆劉翼瀆以疾辭授翼大理評事乙丑觀醮
加號西嶽詔葺夷齊祠丁卯賜寧王元偃服帶鞍馬有
加乙巳次華州幸雲臺觀庚午宴宣澤亭紫雲如龍起
嶽上召見隱士鄭隱李寧賜茶果束帛辛未次閿鄉縣
召見道士柴又立問以無爲之要壬申宴虢州父老於
湖城行宮三月甲戌次陝州召草澤魏野辭疾不至乙
亥賜運船卒時服己卯次西京庚辰罷河北緣邊工役

壬午幸上清宮甲申幸崇法院移幸呂蒙正第賜服御金幣丙戌大宴大明殿丁亥詔葺所經歷代帝王祠廟己丑御五鳳樓觀酺壬辰詔朝陵自西京至鞏縣不舉樂癸巳禁扈從人踐田稼甲午發西京丙申謁安陵永昌諸陵壬寅幸列子廟表潘孝子墓夏四月甲辰朔上至自汾陰壬子幸元傅宮視疾駙馬都尉李遵勗責授均州團練副使峽路鈐轄執爲亂夷人王羣體等帝憫其異俗免死配隸丙辰大宴含光殿己未餞种放歸終南甲子王旦加右僕射元佐爲太尉元偓進封相王乙丑幸元偓宮視疾葺尚書省加王欽若吏部尚書陳堯

叟戶部尙書馮拯工部尙書丙寅以張齊賢爲左僕射
丁卯許國公呂蒙正薨五月丙子加交趾郡王李公蘊
同平章事癸未廬宿泗等州麥自生辛卯幸北宅視德
存疾京兆旱詔振之癸巳詔州城置孔子廟乙未加上
五嶽帝號作奉神述丁酉慮囚死罪流徒降等杖以下
釋之辛丑視德存疾六月丙午太白晝見亳州二龍見
禹祠德存卒丙寅遣使安撫江淮南水災許便宜從事
詔授交甘等州大食蒲端三麻蘭勿巡國奉使官秋七
月壬申朔除閩浙荆湖廣南歲丁錢四十五萬壬午韓
國吳國隋國長主公進封衛國楚國越國長公主鎮眉

昌等州地震己丑詔先蠲濱棣州水災田租十之三今
所輸七分更除其半丙申江洪筠袁江漲沒民田八月
乙巳太白晝見丙午幸南宮視惟敘疾詔除畚田租庚
戌曲宴諸王宰相癸丑賜青州孤老憫獨民帛惟敘卒
丙辰錄唐長孫無忌段秀實等孫授官丁巳詔文武官
有言刑政得失邊防機事者並賜對癸亥甘州回紇可
汗夜落紇奉表詣闕乙丑刻御製大中祥符頌於大承
天祥符門決通利軍合御河壞州城及傷田廬遣使發
粟振之九月丁丑涇原鈐轄曹瑋言籠竿川熟戶蕃部
以閒田輸官請於要害地募兵以居從之戊子幸太乙

宮祈晴辛卯向敏中等爲五嶽奉冊使癸巳御乾元殿
觀酺冬十月戊申御朝元殿發五嶽冊丁巳定江淮鹽
酒價有司慮失歲課帝曰苟便於民何顧歲入也十一
月庚午占城國貢獅子丙子御試服勤詞學經明行修
貢舉人十二月乙巳詔楚秦州潮害稼復租沒溺人賜
千錢粟一斛是歲西涼府夏豐交州甘州諸溪峒蠻來
貢畿內蝗河北陝西劔南饑吉州臨江軍江水溢害民
田舍兗州蚘蚋蟲不爲災

五年正月乙亥賜處州處士周啟明粟帛戊寅雨木冰
壬午幸元偁宮視疾河決棣州二月庚戌詔貢舉人公

罪聽贖丙寅詔官吏安撫濱棣被水農民三月己丑御
試禮部舉人丁未峒會田仕瓊等貢溪布庚戌王旦等
並加特進功臣丁未免濱棣民物入城市者稅一年夏
四月戊申以向敏中爲平章事有司請違法販茶者許
同居首告帝謂以利敗俗非國體不許壬子除通泰楚
州鹽亭戶積負丁額課鹽乙丑樞密直學士邊肅責授
岳州團練副使五月辛未江淮兩浙旱給占城稻種教
民種之戊寅修儀劉氏進封德妃丁亥免棣州租十之
三戊子賜近臣金華殿所種麥六月庚申賜杭州草澤
林逋粟帛壬戌詔常參官舉幕職州縣官充京官癸亥

賜邵武軍被水者錢粟秋七月戊辰作保康門八月丙申朔日有食之丁酉禁周太祖葬冠劔地樵採戊戌張齊賢爲司空致仕甲辰詔樞密直學士限置六員庚戌淮南旱減運河水灌民田仍寬租限州縣不能存恤致民流亾者罪之己未作五嶽觀九月辛未張齊賢入對壬申觀新作延安橋幸大相國寺上清宮射於宜春苑癸酉徙澄海三指揮屯嶺北州郡戊子王欽若陳堯叟竝爲樞密使同平章事丁謂爲戶部侍郎參知政事庚寅幸故鄆王堯王宮冬十月戊午延恩殿道場帝瞻九天司命天尊降己未大赦天下賜致仕官全奉辛酉作

崇儒術論刻石國學閏月己巳上聖祖尊號辛未謝太廟壬申立先天降聖節五日休沐輟刑乙亥詔上聖祖母懿號加太廟六室尊諡丙子羣臣上尊號曰崇文廣武感天尊道應真佑德上聖欽明仁孝皇帝丁丑出舒州所獲瑞石文曰誌公記戊寅建景靈宮太極觀於壽邱辛巳建安軍鑄聖像龍見雲中戊子御製配享樂章并二舞名文曰發祥流慶武曰降真觀德十一月丙申親祀玉皇於朝元殿甲辰加王旦門下侍郎向敏中中書侍郎楚王元佐太師相王元偓太傅舒王元偁太保內外官加恩置玉清昭應宮使以王旦爲之丁未作汴

水發願文庚戌詔允言朝參乙卯罷獻珍禽異獸十二月甲子置景福殿使戊辰作景靈宮京師大寒鬻官炭四十萬減市直之半以濟貧民壬申改諡立聖文宣王曰至聖文宣王戊寅溪峒張文喬等八百人來朝己卯知天雄軍寇準獄空詔獎之乙酉振泗州饑丙戌詔天慶等節日民犯罪情輕者釋之丁亥立德妃劉氏爲皇后是歲交州甘州西涼府溪峒蠻來貢京城河北淮南饑減直鬻穀以濟流民

六年春正月癸巳朔上御朝元殿受朝司天監言五星同色庚子詔減配隸法十二條戊申禁內臣出使預民

政己酉賜京師酺五日辛亥進封衛國楚國越國長公主三人爲徐國邠國宿國庚申置淑儀淑容順儀順容婉儀婉容在昭儀上置司宮令在尙書上以婕妤楊氏爲婉儀貴人戴氏爲修儀美人曹氏爲婕妤好辛酉詔宗正寺以帝籍爲玉牒二月戊辰觀酺己亥泰州言海陵草中生聖米可濟饑三月丁未詔沙門島流人罪輕者徙近地乙卯建安軍鑄玉皇聖祖太祖太宗尊像成以丁謂爲迎奉使夏四月庚辰詔淮南給饑民粥麥登乃止壬午太白晝見癸未幸元僂宮視疾丙戌詔諸州死罪可疑者詳審以聞五月壬辰詔伎術官未升朝特賜

緋紫者勿佩魚甲辰聖像至丙午詔聖像所經郡邑減繫囚死罪流以下釋之升建安軍爲眞州乙卯謁聖像奉安於玉清宮丁巳遣使奏告諸陵六月壬戌惟和卒趙州黑龍見丁卯壽州獻紫莖金芝癸酉保安軍雨河溢兵民溺死遣使振之丙子詔翰林學士陳彭年等刪定三司編敕丁丑崇飾諸州黃帝祠廟秋七月癸巳上清宮道塲獲龍於香合中己亥中書門下表請元德皇后祔廟庚子行配祔禮癸卯詔天下勿稅農器己酉亳州官吏父老三千三百人詣闕請謁太清宮八月庚申詔來春親謁亳州太清宮辛酉以丁謂爲奉祀經度制

置使丙寅禁太清宮五里內樵採庚午加號太上老君
混元上德皇帝置禮儀院九月庚寅幸元偁宮視疾丁
酉出玉宸殿種占城稻示百官冬十月辛酉元德皇后
祔廟甲子亳州太清宮枯檜再生真源縣菽麥再實癸
酉謁玉清昭應宮己卯作步虛詞付道門壬午降聖節
賜會如先天節儀十一月辛亥幸元偁宮視疾癸丑賜
御史臺九經諸史甲寅判亳州丁謂獻芝草三萬七千
本乙卯龜茲遣使來貢十二月戊午朔日有食之庚申
涇原鈐轄曹瑋言發兵討原州界撥藏族違命者捕獲
甚衆回鶻遣使來貢己巳天書扶侍使趙安仁等上奉

天書車輅鼓吹儀仗壬申獻天書於朝元殿遂告玉清
昭應宮及太廟乙亥幸開寶寺上清宮己卯幸太一宮
戎瀘蠻寇平是歲西蕃高州蠻龜茲來貢

七年春正月辛丑慮囚壬寅車駕奉天書發京師丙午
次奉元宮判亳州丁謂獻白鹿一芝九萬五千本戊申
王旦上混元上德皇帝冊寶己酉朝謁太清宮天書升
輅雨雪倏霽法駕繼進佳氣彌望是夜月重輪幸先天
觀廣靈洞霄宮曲赦亳州及車駕所經流以下罪升亳
州爲集慶軍節度減歲賦十之二改奉元宮爲明道宮
太史言含譽星見庚戌御均慶樓賜酺三日壬子詔所

過頓遞侵民田者給復二年丙辰建南京歸德殿赦境
內及京畿車駕所過流以下罪追贈太祖幕府元勛僚
舊錄常參官逮事者並進秩欲授子孫者聽作鴻慶宮
二月戊午次襄邑縣皇子來朝庚申夏州趙德明遣使
詣行闕朝貢辛酉至自亳州丙寅詔天地壇非執事輒
臨者斬辛未饗太廟壬申恭謝天地大赦天下乙亥益
州鑄大鐵錢三月城洧井監癸巳雄州甲仗庫火甲午
制加宰相王旦向敏中楚王元佐相王元偓舒王元偁
榮王元儼樞密使同平章事乙未宴翔鸞閣辛丑發粟
振儀州饑復諸州觀察使兼刺史甲辰幸元偁宮視疾

丁未封皇子慶國公青州民趙嵩百一十歲詔存問之
夏四月丁巳西涼府廝鐸督遣使來貢己未賜淮南諸
州民租十之二癸亥河南府獄空有鳩巢其戶生二雛
甲子以歸義軍留後曹賢順爲歸義軍節度使丙子舒
王元偁薨五月壬辰王旦爲兗州景靈宮朝修使乙未
又爲天書刻玉使涇原言葉施族大首領艷般率族歸
順六月乙卯禁文字斥用黃帝名號故事丙辰眉州通
判董榮受賕鬻獄長安知縣王文龜酗酒濫刑竝投荒
裔戊午戒州縣官吏決罪逾法壬申封婉儀楊氏爲淑
妃乙亥樞密使王欽若罷爲吏部尚書陳堯叟爲戶部

尚書以寇準爲樞密使同平章事丙子詔棣州經水流
民歸業者給復三年秋七月辛丑交州李公蘊敗鶴柘
蠻獻捷癸卯太白晝見甲辰以同州觀察使王嗣宗內
客省使曹利用竝爲樞密副使八月甲寅置景靈宮使
以向敏中爲之乙卯除江淮兩浙被災民租丁巳楊光
習坐擅領兵出砦又誣軍中謀殺司馬張從吉配隸鄧
州乙丑給河東沿邊將士皮裘氈襪甲戌河決澶州丁
丑命內臣奉安太祖太宗聖像於鴻慶宮辛巳詔嶺南
戍兵代還日人給裝錢五百九月丙戌含譽星再見辛
卯尊上王皇聖號曰太上開天執符御歷含真體道玉

皇大天帝戊戌御試服勤詞學經明行修舉人辛丑幸
五嶽觀冬十一月乙酉濱州河溢玉清昭應宮成詔減
諸路繫囚罪流以下一等己丑加王旦司空修宮使壬
辰御乾元門觀酺十二月癸丑朔日當食不虧丙辰詔
王欽若等五人各舉京朝幕職州縣官詳練刑典曉時
務任邊寄者二人丁巳詔川峽閩廣轉運提點刑獄官
察屬吏貪墨慘刻者己未作元符觀庚申契丹使蕭延
寧等辭歸國辛酉加楚王元佐尚書令相王元偓大尉
榮王元儼兼中書令忠武軍節度使魏咸信同平章事
餘竝進秩涇原路請築籠竿城是歲夏州西涼府高麗

女真來貢淮南江浙饑除其租天下戶九百五萬五千七百二十九口二千一百九十七萬六千九百六十五年春正月壬午朔謁玉清昭應宮奉表告尊上玉皇大帝帝聖號奉安刻玉天書于寶符閣還御崇德殿受賀赦天下非十惡枉法賊及已殺人者咸除之文武官滿三歲者有司考課以聞乙酉詔環州緣邊卒人賜薪水錢庚寅置清衛二指揮奉宮觀乙未皇女入道戊戌徙棣州城庚戌詔王欽若等舉供奉官至殿直有武幹者一人二月泗州周憲百五歲詔賜束帛甲寅宗正寺火丙辰脩廡立遵貢名馬丙寅以元佐爲天策上將

軍興元牧賜劔履上殿詔書不名丁卯遣使巡撫淮浙
路癸酉祈雨丙子詔進士六舉諸科九舉者許奏名庚
辰大雨三月乙酉幸元偃宮視疾戊戌宴宗室射于苑
中壬寅御試禮部貢舉人夏四月辛酉賜宰相五臣論
壬戌以寇準爲武勝軍節度使同平章事王欽若陳堯
叟竝爲樞密使同平章事戊辰德彛卒壬申榮王元儼
宮火延及殿閣內庫癸酉詔求直言命丁謂爲大內修
葺使戊寅王膺坐應詔言事乖繆貶五月壬午榮王元
儼罷武信軍節度使降封端王庚寅熒惑犯軒轅壬辰
廢內侍省黃門禁金飾服器庚子放宮人一百八十四

人六月己酉朔日有食之辛未詔諸州以御製七條刻石乙亥惟忠卒閏月己卯赦天下庚辰王欽若上彤管懿範七月丙辰以諸州牛疫免牛稅一年戊午王嗣宗爲大同軍節度使丙寅宰相王元偓新宮以宮城火詔諸王徙宮于外丙子幸瑞聖園觀稼宴射於水心殿八月己卯大理少卿閣允恭開封判官韓允坐枉獄除名戊戌詔京兆河中府陝同華虢等州貸貧民麥種九月注輦國貢土物珍珠衫帽甲寅喚厮囉聚衆數十萬請討平夏人以自效丁卯宴宗室射於後苑己巳賜注輦使袍服牲酒冬十月乙巳王欽若上聖祖先天紀戊申

回鶻呵羅等來貢十一月辛酉相王元偓加兼中書令
端王元儼進封彭王癸亥高麗使同東女真來貢十二
月戊寅皇子冠丁亥侍禁楊承吉使西蕃還以地理圖
進辛卯太子慶國公封壽春郡王是歲占城宗哥族及
西蕃首領來貢坊州大雨河溢陝西饑

九年春正月丙辰置會靈觀使以丁謂爲之加刑部尚
書壬申以張士遜崔遵度爲壽春郡王友二月丁亥王
旦等上兩朝國史戊子加旦守司徒修史官以下進秩
賜物有差甲午詔以皇子就學之所名資善堂延州蕃
部饑貸以邊穀三月丙午除雷州無名商稅錢秦州曹

瑋撫捍蕃境得宜詔嘉之己酉王欽若上寶文統錄辛酉以西蕃宗哥族李立遵爲保順軍節度使壬寅詔舉官必擇廉能癸亥置修玉牒官乙丑著作佐郎高清以贓賄杖脊配沙門島夏四月庚辰周伯星見丙申賜天下酺振延州蕃族饑庚子幸陳堯叟第視疾壬寅以唐相元稹七世孫爲台州司馬五月乙巳邠寧環慶部署王守斌言夏州蕃騎千五百來寇慶州內屬蕃部擊走之癸丑幸南宮視惟憲疾甲寅惟憲卒乙卯毛尸等三族蕃官馮移理率屬來歸詔撫之丙辰詔天下繫囚死罪減等流以下釋之丁巳向敏中爲宮觀慶成使甲子

左天廡草場火庚午太白晝見六月戊寅幸會靈觀宴
祝禧殿癸未京畿蝗秋七月撫水蠻寇宜州廣南西路
請便宜掩擊許之丁未增築京師新城丙辰開封府祥
符縣蝗附草死者數里戊午停京城工役癸亥以畿內
蝗下詔戒郡縣甲子詔京城禁樂一月丁卯幸太乙宮
天清寺八月壬申知秦州曹瑋言伏羌砦蕃部廝雞波
與宗哥族連結爲亂以兵夷其族帳丙子令江淮發運
司留上供米五十萬以備饑年磁華瀛博等州蝗不爲
災丙戌製玉皇聖號冊文以陳堯叟爲右僕射戊子以
旱罷秋宴壬辰羣臣請受尊號冊寶表五上從之九月

癸卯雄霸河溢甲辰以丁謂爲平江軍節度使丙午陳
彭年王曾張知白竝參知政事丁謂曹瑋言宗哥唃廝
囉蕃部馬波叱臘魚角蟬等寇羌伏砦擊敗之斬首千
餘級庚戌以不雨罷重陽宴利州水漂棧閣甲寅雨督
諸路捕蝗丁巳詔以旱蝗得雨宜務稼省事及罷諸營
造戊午禁諸路貢瑞物戊辰青州飛蝗赴海死積海岸
百餘里己巳詔民有出私廩振貧乏者三千石至八千
石第授助教文學上佐之秩冬十月己卯王欽若表上
翊聖保德真君傳壬申詔馮拯等各舉殿直以上武幹
者一人壬辰置直龍圖閣十一月會靈觀甘露降乙巳

詔河陝諸路州簡禁軍五百人丁未河西節度使石普坐妄言災異除名流賀州丁卯以唐裴度孫坦爲鄭州助教是歲西蕃宗哥族邛部山後蠻夏州甘州來貢諸州有隕霜害稼及水災者遣使振卹除其租

天禧元年春正月辛丑朔改元詣玉清昭應宮薦獻上玉皇大帝寶冊袞服壬寅上聖祖寶冊己酉上太廟謚冊庚戌享六室辛亥謝天地於南郊大赦御天安殿受冊號乙卯宰相讀天書於天安殿遂幸玉清昭應宮作欽承寶訓述示羣臣壬戌詔以四月旦日爲天祥節丙寅命王旦爲兗州太極觀奉上冊寶使二月庚午詔

振災發州郡常平倉壬申御正陽門觀酺丁丑置諫官
御史各六員每月一員奏事有急務聽非時入對戊寅
王旦加太保中書侍郎平章事向敏中加吏部尚書楚
王元佐領雍州牧相王元偓加尚書令兼中書令進封
徐王彭王元儼加太保壽春郡王禎兼中書令王欽若
加右僕射趙德明加太傅中外官並加恩辛巳考課京
朝官改秩及考者壬午定宗室子授官之制庚寅進封
李公蘊爲南平郡王秦州神武軍破宗哥族馬波叱臘
等於野吳谷多獲人馬己亥陳彭年卒三月辛丑以不
雨禱於四海壬寅不雨罷上巳宴庚申免潮州逋鹽三

百七十萬有奇辛酉令作淖糜濟懷衛流民夏四月庚辰陳堯叟卒戊子邵州野竹生實以食饑五月戊戌詔所在安卹流民戊申以王旦爲太尉侍中五日一入中書旦懇辭不拜己酉熒惑犯太微乙卯縱歲獻鷹犬己未奉太祖聖容於西京應天院向敏中爲禮儀使諸路蝗食苗詔遣內臣分捕仍命使安撫六月壬申赦西京繫囚死罪減一等流以下釋之父老年八十者賜茶帛除其課役戊寅除昇州後湖租錢五十餘萬聽民漑田陝西江淮南蝗並言自死庚辰盜發後漢高祖陵論如律并劾守土官吏遣內侍王克讓以禮治葬知制誥劉

筠祭告因詔州縣申前代帝王陵寢樵採之禁乙酉免
大食國蕃客稅之半龜茲國使張復延等貢玉勒鞍馬
令給其直己丑王旦對於崇政殿秋七月丁未霖雨放
朝己未幸魏咸信第視疾甲子魏咸信卒八月庚午以
王欽若爲左僕射兼中書侍郎平章事壬申向敏中加
右僕射兼門下侍郎王旦對於便殿丙子詔京城禁圍
草地聽民耕牧丁丑禁採絨戊寅免牛稅一年九月癸
卯以參知政事王曾爲禮部侍郎李廸爲參知政事馬
知節知樞密院事曹利用任中正周起並爲知樞密院
事丙午幸王旦第視疾戊申以蝗罷秋宴己酉王旦薨

甲寅詔能拯救汴渠覆溺者給賞或溺者貧者以官錢給之丁未敎衛士騎射冬十月辛未詔閤門自今審官三班院流內銓後殿日引公事勿過兩司壬申諭諸州非時災沴不以聞者論罪己卯罷京東上貢物辛卯賜壽春郡王及王友張士遜等詩十一月己亥詔曲宴日輟後殿視事辛丑曹瑋平鬼留家族壬寅詔准浙荆湖治放生池禁漁採乙卯幸太一宮大雪帝謂宰相曰雪固豐稔之兆第民力未充慮失播種卿等其務振勸毋遺地利壬戌契丹使耶律準來賀承天節高麗使徐訥率女真首領入對崇政殿獻方物十二月丙寅京城雪

寒給貧民粥并瘞死者乙亥罷京城工役丙子嚴寒放朝丁丑放逋負釋繫囚己卯女真國人歸給裝錢高麗使徐訥賜射瑞聖園辛卯詔陝西緣邊鬻穀者勿算壬辰遣使緣汴河收瘞流尸是歲三佛齊龜茲國來貢諸路蝗民飢鎮戎軍風雹害稼詔發廩振之蠲租賦貸其種糧

二年春正月乙未真遊殿芝草生壬寅振河北京東飢辛亥賜壽春郡王卹民歌戊午王欽若等上天禧大禮記四十卷己未遣使諭京東官吏安撫飢民又命諸路振以淖糜二月丙寅甘州來貢丁卯壽春郡王加太保

進封昇王詔近臣舉常參官堪任御史者庚午右正言
劉燁請自今言事許升殿從之庚辰振京西饑乙酉幸
徐王元偓宮視疾三月辛丑修京城丙辰先貸貧民糧
種止勿收夏四月戊子幸飛山雄武教塲宴賜從臣將
士庚寅赦天下死罪減一等流以下釋之閏月辰州討
下溪州蠻斬首六十餘級降千餘人已亥詔戶部尚書
馮拯等舉幕職令錄堪充京官者各二人癸卯馬知節
爲彰德軍留後丁未靈泉出京師飲者愈疾作祥源觀
壬子幸徐王元偓宮視疾五月壬戌詔長吏卹孝弟力
田者甲子徐王元偓薨丁卯釋下溪州蠻彭儒猛罪丙

戊酉京訛言妖如帽夜蜚民甚恐六月壬辰詔三班使
臣經七年者考課遷秩己亥詔諸州上佐文學參軍謫
降十年者聽還鄉乙巳訛言帽妖至京師民夜叫譟達
曙詔捕嘗爲邪法人耿槩等棄市辛亥彗出北斗魁秋
七月壬申以星變赦天下流以下罪減等左降官羈管
十年以上者放還京師京朝官丁憂七年未改秩者以
聞丁亥彗沒八月庚寅羣臣請立皇太子從之壬寅下
溪州彭儒猛納所掠漢生口器甲等詔賜袍帶甲辰立
皇子昇王爲皇太子大赦天下宗室加恩羣臣賜勛一
轉戊申黎州山後兩林百蠻都王李阿善遣使來貢壬

子彭王元儼進封通王以李廸兼太子賓客癸丑作元
良箴賜皇太子甲寅楚王元佐加興元牧徐國長公主
進封福國邠國長公主進封建國宿國長公主進封鄂
國乙卯詔畎索河水入金水河丙辰以德雍德文惟政
竝爲諸州防禦使允成允升允寧竝爲諸州團練使九
月丁卯冊皇太子庚午詔全給外戍諸軍物庚辰御乾
元門觀酺冬十月庚子御玉宸殿召近臣觀刈占城稻
遂宴安福殿十二月辛丑以張旻爲武寧軍節度使同
平章事是歲占城國甘州溪峒黎州山後蠻來貢陝西
旱振之江陰軍蝻不爲災

三年春正月癸亥貢舉人郭積等見崇政殿積冒喪赴
舉命典謁詰之卽引咎殿三舉二月乙未河南府地震
三月戊午朔日有食之遣呂夷簡體訪陝亳民訛言丙
寅御試禮部貢舉人癸未翰林學士工部尚書錢惟演
等坐知舉失實降一官甲申潁州石隕出泉飲之愈疾
夏四月甲午西上閣門使高繼勛坐市馬虧直削官五
月丁巳大食國來貢乙丑左諫議大夫戚綸坐訕上貶
岳州副使辛未慮囚六月癸未浚淮南漕渠廢三堰甲
午王欽若爲太子太保河決滑州戊戌以寇準爲中書
侍郎兼吏部尚書平章事丁謂爲吏部尚書參知政事

滑州決河泛澶濮鄆齊徐境遣使救被溺者卹其家秋
七月壬申曹璨卒羣臣表上尊號曰體元御極感天尊
道應真寶運文德武功上聖欽明仁孝皇帝八月丁亥
大赦天下普度道釋童行滑州龍見河決辛卯太白晝
見己亥慶州亾去熟戶委乞等來歸庚戌遣使撫卹京
東西河北水災九月乙丑慶州骨咩大門等族歸附辛
巳遣中官存問高麗貢使之被溺者冬十一月己巳謁
景靈宮庚午饗太廟辛未祀天地於園丘大赦天下選
兩任五考無責罰者試身言書判丁丑御天安殿受尊
號冊十二月丙戌富州蠻酋向光澤表納土詔却之辛

卯向敏中加左僕射中書侍郎兼禮部尚書平章事寇
準加右僕射通王元儼進封涇王曹利用丁謂竝爲樞
密使百官加恩癸巳以任中正周起竝爲樞密副使是
歲高麗女真來貢江浙及利州路飢詔振之

四年春正月乙丑以華州觀察使曹瑋爲鎮國軍留後
僉樞密院事丙寅開揚州運河己巳幸元符觀庚午贈
處士魏野著作郎賜其家粟帛二月帝不豫癸未遣使
安撫淮南江浙利州飢民滑州決河塞辛丑發唐鄧八
州常平倉振貧民三月戊午以淄州民飢貸牛糧甲子
振蕃部粟庚子詔川陝致仕官聽還本貫癸酉川廣舉

人勿拘定額己亥振益梓民飢己卯向敏中薨夏四月
丁亥大風晝晦庚寅分江南轉運使爲東西路丙申杖
殺前定陶縣尉麻士瑤於青州五月丁巳發粟振秦隴
六月丙申以寇準爲太子太傅萊國公河決滑州壬寅
御試禮部奏名舉人九十三人秋七月丁巳太白晝見
辛酉京城大雨水壞廬舍大半丙寅以李迪爲吏部侍
郎兼太子少傅平章事馮拯爲樞密使吏部尙書同平
章事以霖雨壞營舍賜諸軍緡錢庚午以丁謂爲平章
事曹利用同平章事癸酉入內副都知周懷政伏誅丁
丑太子太傅寇準降授太常卿翰林學士盛度樞密直

太子詹事晏殊爲太子左庶子己巳詔謂赴中書視事如故甲午詔自今除軍國大事仍舊親決餘皆委皇太子同宰相樞密使等參議行之太子上表陳讓不允以丁謂兼太子少師馮拯兼少傅曹利用兼少保辛未詔自今羣臣五日於長春殿起居餘隻日視朝於承明殿甲戌丁謂等請作天章閣奉安御集十二月乙酉皇太子親政詔內臣傳旨須覆奏丁亥龜茲甘州回鶻遣使來貢己丑王欽若加司空庚寅議事資善堂命張景宗侍皇太子丁酉以王欽若爲山南東道節度使同平章事閏月丁卯以唃廝囉爲邊患詔陳堯叟等巡撫庚午

京城穀貴減直發常平倉乙亥帝不豫力疾御承明殿
賜手書宰相諭以輔導儲貳之意是歲京西陝西江淮
荆湖諸州稔

五年春正月己丑帝疾愈出幸啟聖院癸巳詔天下死
罪降流以下釋之乙未遣使撫京東水災丁酉以張士
遜爲樞密副使己亥宴近臣承明殿二月甲寅審刑院
言天下無斷獄丙寅賜天下酺庚午以孔子四十七世
孫聖祐襲封文宣公三月辛巳御正陽門觀酺辛丑京
東西水災賜民租十之五壬寅丁謂加司空馮拯加左
僕射曹利用加右僕射任中正工部尙書夏四月丙辰

客星出軒轅五月乙亥慮囚降天下死罪六月丙午太白晝見秋七月甲戌朔日有食之戊寅新作景靈宮萬壽殿八月壬戌熒惑犯南斗九月戊寅唢廝囉請降冬十月癸卯蠲京東西淮浙被災民租壬子依漢唐故事五日一受朝遇慶會皇太子押班十一月戊子王欽若以山南東道節度使坐擅赴闕降司農卿分司南京是歲高麗遣使來貢京東河北兩川荆湖稔

乾興元年春正月辛未朔改元丁亥御東華門觀燈戊戌蠲秀州水災民租二月庚子大赦天下癸卯上尊號曰應天尊道欽明仁孝皇帝詔蘇湖秀州民飢貸以廩

粟甲辰制封丁謂爲晉國公馮拯爲魏國公曹利用爲
韓國公庚戌詔徐州振貧民甲寅對宰相於寢殿帝不
豫增劇禱於山川神祇戊午帝大漸遺詔皇太子於柩
前卽皇帝位尊皇后爲皇太后權處分軍國事淑妃爲
皇太妃帝是日崩於延慶殿年五十五在位二十六年
十月己酉葬永定陵己未祔太廟天聖二年十一月上
尊諡曰文明武定章聖元孝皇帝廟號真宗慶曆七年
加諡膺符稽古神功讓德文明武定章聖元孝皇帝
贊曰真宗英悟之主其初踐位相臣李沆慮其聰明必
多作爲數奏災異以杜其侈心蓋有所見也及澶淵旣

盟封禪事作祥瑞沓臻天書屢降導迎奠安一國君臣如病狂然吁可怪也他日修遼史見契丹故俗而後推求宋史之微言焉宋自太祖幽州之敗惡言兵矣契丹其主稱天其后稱地一歲祭天不知其幾獵而手接飛鴈鴟自投地皆稱爲天賜祭告而誇耀之意者宋之諸臣因知契丹之習又見其君有厭兵之意遂進神道設教之言欲假是以動敵人之聽聞庶幾足以潛消其窺覷之志歟然不思修本以制敵又效尤焉計

書錄

宗以天書殉葬山陵嗚呼賢哉

宋史卷八